




	<p style="text-align: center;">Meymûnê wekî dadger</p> <p style="text-align: center;">übersetzt von Mahmut Aydın</p>
	<p>Berê, dema ku hema hema hemû ajal hê jî bi serbestî digeriyan û tenê çend ji wan bi mirovan re dijiyan, kûçkek û pisîkek li mala zanyarekî dijiyan.</p> <p>Rojekê vî zanyarî kûlîçeyeke teze wek diyarî girt.</p> <p>Ji ber ku diviyabû ew çend demjimêran ji malê derbiketa, ji bo tiştêk pê neyê, ew danî ser refika ku bi dîwêr ve daliqandibû.</p>
	<p>Pisîkê bi baldarî li zanyar temaşe kiribû, û gava ku ew ji derî ve derket, xwe avêt ser kursiya ji cîl a ku li ber pencereyê bû, ji wir jî bazda ser maseyê, ji ser maseyê jî bi bazdanek bihêz û dirêj bazda ser refikê.</p> <p>Bizmarê bi zorê bi cîlên hûnandî refik bi dîwêr ve girtibû, xwe li hemberî vê bazdana bihêz negirt.</p> <p>Refik bi paste û pisîkê re, bi hêwirze hatin ketin xwarê.</p> <p>Kûçik tevlixew xwe li ber tava rojê dirêj kiribû, li benda vegera xwediyê xwe bû.</p>
	<p>Ji ber dengê ji nişkan ve ji cihê xwe veciniqî, bi lez derbasî hundirê jûrê bû.</p> <p>Dema pasteya bêhnxweş di nava pencên pisîkê de dît, ber bi wê ve bazda û xwest pasteyê jê bigire.</p> <p>Pisîkê bi qîjînî bertek nîşan da, pencek xwirt avêt pozê hevalê xwe yê malê.</p> <p>Kûçik kir kûzekûz.</p>
	<p>Meymûnê ku li ser dîwarê baxçe werziş dikir, di pacê re bi meraqdarî li wan temaşe dikir.</p> <p>Kêfa xwe bi wan anî û got "Hûn her du çima di hewayeke wiha xweş de pev diçin?"</p> <p>Kûçik bihêrs ewtiya û got, "Vî pisîkê diz ê kêrî tiştêkî nayê pasteya xwediyê me didize!"</p>

	<p>Pisîkê bihêrs got, "Çi ji te re? Dema te xwe bi teralî li ber tavê dirêj kiribû, min têra xwe zehmetî kişandin. Min paste bi keda xwe qezenc kir!"</p> <p>Kûçîk giricî û got "Cinawirê bêhiş û xweperest, tu bawer dikî, tu yê pasteyê bi serê xwe bixwî? Ew ya xwediyê me ye, para min jî tê de ye."</p>
	<p>Meymûn dibêje, "Rawestin, pevneçin! Paste ji bo we herduyan têra xwe ne mezin e?"</p> <p>Ez li ser maseyê mêzînekê dibînim.</p> <p>Ez ê vê pasteyê ji bo we bikim du beşên bi qasî hevdu."</p> <p>Kûçîk û pisîkê, herduyan jî ev pêşniy pejirandin.</p>
	<p>Wan bi heyecan temaşe kirin, ku meymûnê çawa paste kir du perçe, nîvê wê danî ser çaviyeke mêzîne û nîvê din jî danî ser çaviya mêzîne ya din.</p> <p>Çaviyek mêzîne got tep, ket xwarê.</p> <p>Meymûn bi awirekî cidî got "Ev aliyê han hinekî giran e." û ji aliyê giran bi dilxweşî çend parî jêkir û bi dilbijîn avêt devê xwe.</p> <p>Kûçîk û pisîkê bi hêvî lê temaşe dikirin ku çaviya mêzîne ya giran çawa bilind dibe.</p> <p>Kûçîk deng lê kir, got "Niha baş e!"</p>
	<p>Meymûnê bi tundî got, "Na!"</p> <p>"Ev parçeya pasteyê hîn jî giran e.</p> <p>Nabe ku li pişt min bê gotin, ez dadgerekî bêdalet im."</p> <p>Bi van gotinên xwe re dîsa ji pasteyê parçeyekî piçûk ê din qetand diqetîne û avêt devê xwe.</p> <p>Lê ji ber ku wî ji vê çaviyê zêde girtibû, vê carê çaviya din a mêzîne hat xwarê.</p> <p>Meymûnê di ber xwe de çend peyv gotin û dest pê kir, ji aliyê din parçe bi parçe jêkir û bi kêfxweşî avêt devê xwe, heta ku her du çaviyên mêzîne hêdî hêdî nêzî hev du bûn.</p>

	<p>Cara dawîn ji aliyê mezin parçeyek mezin hilda, ev parçe ji yê din piçûktir bû û ev çaviya mêzînê jî bilind bû.</p> <p>Diviyabû wî ji nû ve dest bi karê xwe bikira.</p> <p>Vê pêvajoyê berdewam kir, heta çaviyek mêzînê bi tevahî vala bû û di çaviya din de jî bi tenê parçeyek pir piçûk ma.</p>
	<p>Ew li vir hers ket , bi kûçik û pisîkê re xeyidî û got: "Hûn ji bo tiştêkî wiha piçûk û pêkenok pevdîçin û hewl didin ku min jî ji bo vê bikin hekem!</p> <p>Divê hûn şerm bikin!</p> <p>Di encamê de ji bo ku aştî pêk were, vî parçeyê mayî jî ez ê bixwim."</p> <p>Ew wî parçeyê dawîn jî avêt devê xwe û di pacê re deket û çû.</p> <p>Kûçik û pisîk bi şaşwazî li çûna wî temaşe dikin.</p>
	<p>Pisîkê kire mirremir û got, "Ya ku te niha kir, ev e!"</p> <p>Kûçik giricî û bersiva wê da, got "Tu çima wisa çikûs bûyî?" û cardin çû li cihê xwe yê bi tav xwe dirêj kir.</p> <p>Kir hurmehurm, got "Êdî mirov nikare bi kesî bawer bibe" û dîsa ket xewê.</p>
	<p style="text-align: center;">Dawî</p>